



# Komunikado

20 di febrüari 2019

---

## Medida drástiko ta inevitabel pa Kòrsou

**Willemstad – Gobièrnu di Kòrsou a haña tempu te 6 di mart próksimo pa presentá solushon pa un suma di por lo ménos 127 mion pa sera e défisit di e presupuesto di 2019. Meskos ku tabata e kaso den e último dos añanan, e aña aki tambe ta vislumbrá un défisit presupuestario, a base di kua no ta kumpli ku e normanan di e Lei di Reino di supervishon finansiero. Esaki ta pone ku mester di medida fuerte i urgente pa drecha Kòrsou su presupuesto. E medidanan aki mester surti un efekto durante di mas aña, ya ku riba término mas largu tambe ta pronostiká un défisit substansial.**

Minister Gijsbertha anteriormente ya a indiká ku a base di e entradanan di impuesto desepshonante, el a redusí e kalkulashon inisial di e ingresonan aki den presupuesto di 2019 ku 92 mion florin. Riba esaki mester tene kuenta ku un bahada adishonal di un mínimo di 34 mion florin pa loke ta trata otro ingreso. Pa e motibu aki den 2019 gobièrnu mester presentá por lo ménos 127 mion florin na medida ku realmente lo oumentá su entradanan i/òf redusí su gastunan. Komo konsekuensia di e hecho ku e gastunan di malesa i e gastunan di fondo di penshon di behes (AOV) ta subiend, ta pronostiká tambe un défisit di mas aña den e fondonan sosial. Esakinan ta krese yega te 1,25 miar (mil mion) na 2028. Presidente Raymond Gradus ta deklará den e cuadro aki: "Pa por garantisá e fasilidatnan di seguro sosial aki pa e próksimo generashonnan tambe, ta nesesario pa bini ku reforma, kual lo hasi e presupuesto di mas aña realístiko i sostenibel."

Gobièrnu di Kòrsou ya a presentá algun medida kaba, manera un paro na obligashonnan nobo, paro na tumamentu di mas personal den servisio i suspenshon di e toma di desishon riba indeksashon di e personal di gobièrnu. Cft sinembargo a pidi un pakete kompleto di medida, ku pa aña 2019 mester yega e suma mínimo di 127 mion florin, i ku lo mester pone òrdu tambe den e presupuesto di mas aña. Adishonalmente Cft a pidi pa inventarisá e sobrá riesgonan pa e presupuesto, manera e konvenio di enseñansa, e gastunan adishonal di HNO, e debenan ku a sobra di Sehos i e défisit di eksplotashon di C-Post, i brinda un kobertura pa esakinan. Cft a duna gobièrnu tempu te pa mas tardá 6 di mart próksimo, pa por permití un komishon ku a keda instituí ku e meta aki, efektuá un evaluashon di e presupuesto. Esaki mester kondusí na un adaptashon di presupuesto, ku mester entregá na Parlamento promé ku dia 1 di aprel.

Durante su bishita na Kòrsou, Cft a kòmbersá ku Gobernador, Konseho di Minister, Minister di Finansa, komishon finansiero di Parlamento i e gerensianan di Sehos i SVB. Tambe a tene un reunion ku Minister di Finansa, SOAB, Kontrolaria General di Kòrsou i Cft, den kua a diskutí e trayekto (roadmap) pa yega na un deklarashon aprobatorio di akountent pa e kuenta anual di 2021. Cft ta konsistí di e siguiente miembronan: Raymond Gradus (presidente), Gregory Damoen (miembro na nòmber di Kòrsou), Henk Kamp (miembro na nòmber di Hulanda) i Russell Voges (miembro na nòmber di Sint Maarten).

[Fin di komunikado]



**Fotógrafa**

Berber van Beek

**Teksto pa foto:**

Gobièrnu di Kòrsou a haña tempu te 6 di mart pa presentá solushon pa e suma di 127 mion.

**Nota pa redakshon- no pa publikashon**

Persona di kontakto na Cft:

Sekretariado Kolegio di supervishon finansiero

Manus Twisk- Sekretario

Telefon (+5999) 461-9081 / (+5999) 461-9082 / (+5999) 461-9084

Email [info@cft.cw](mailto:info@cft.cw)

Internet [www.cft.cw](http://www.cft.cw)

Persona di kontakto pa Prensa:

Jefka Martina

Telefon (+5999) 512-6861